



廬山太平興國宮採訪真君事實卷之六

碑記類

九天使者廟碑并序

蘄州黃梅縣東山衡門之下草莽臣李玘撰

玘按江州德安縣撫州太守王阮錄寄事實云唐李玘有學不仕至開元中明皇夢神人稱廬山使者求立廟詔刺史獨孤正營建下諸州令所在學士制使者碑文凡作者六百八十一人獨玘文入用詔召不赴本宮舊記所刊纔五百五十一字淳祐乙巳中書程滄洲於秘書省得全文凡一千七百七十一字但此玘字異今兩存之餘見程中書跋文

伏稽諸大易曰一陰一陽之謂道陰陽不測之謂神惟道也生三混成洞微於變化惟神也得一而妙蓄

秘於恬冥欽若太元遐徵妙有運陶甄之極不獨尊
歟后唐累聖光華大明終始陟曦陽之午廓照瑤京
操元命之符銘昌鼎筭白雲孤峙時望高丘紫炁千
齡日飛函谷我開元神武皇帝圓靈受睠方輿龍祕
握玄珠之妙捐可寶之珍演至道於希夷刊雜法之
疑滯乃聖一也於穆祀典清廟皦皦孝友光明天地
化仰乃神二也劔戟之器返於三農弧矢之威神斷
六合乃武三也察時變者觀乎天文人習凡庸無階
測聖乃文四也故冲精象外高視鴻名昂薦河圖靈
朝海堯若心攝照顧言筌於几籙軒目司明屈旌乘

於茨隗所以虞環益地夏至從天納殊賁於西王展
告成於東后五龍推紀邁梁甫之高曾八駿巡遊陋
崑嶽之徹疏昭回上轉山嶽下騰列聖攸居通仙福
會文皇質義武帝佩圖至道之興其來尚矣自華封
獻壽聖德祈年金格傳書珠流味液公主以天慈入
道挹化芙蓉祕監以王子出家調芳芝朮北方著列
仙之想南丹希至學之因聖緒無爲斯其有作乃睠
群嶽真君道府光啓祠室幽贊神宗青城廬嶽二山
者佐命羣峯之望也丈人仙錄祕諦真君使者靈司
孔昭冥察名書五法舉亞三魔瀋洩崇巒異弗騫於

物阜寒暑穹谷將必順於人時開元十九年八月二十一日降明旨曰青城山丈人廟廬山使者廟宜準三嶽真君廟例抽德行道士五人焚修供養仍委所管揀擇灼然道行者安置具年名申所由敕置廟使內供奉將使者真圖建立祠廟并章醮行道設齋使大供道觀法師張平公粵自秦京宣猷江服煥丹青之飾賜玄札之儀駟傳光臨雲巖皎色使持節江州諸軍事守江州刺史獨孤正重鎮柴桑孚謠枳棘時觀武庫代伏文雄經始干城全募益厲崇規逸麗壯思逾紛朝散大夫行長史楊楚玉行司馬皇甫楚玉

得陽縣令魏昌等恭惟聖善式議靈場道俗虔精冥休推異爰初築土則雨霾煙嶂俄頃佇立而色霽霞標寶龜奠臬之辰金虬驛程之際陰濛滂密黜晦端交注想玄空肅思皇道芬芳載潔章醮翹襟六虛窈冥一夕融朗半空之上忽吐神輝綴灼九激頽揚千仞窠窠率朴人吏並觀昔天靈降周以雲門舞奏神光燭漢以太一登禋然此陸氣交南州煥變物委霜霰人嗟沍寒使法師恬懇仙庭憑威國命故玄冬易爓朱景晴輝暢以幽明優乎力役並利攸徃咸欣子來便小勝郊遂甄靈域騰頽桂嶺鬱翠松巖召斷郢

門倚材荆岫疏峻滅繚長垣紅壁列錢丹楹繡礎三
間四表炳繪文椀八維九隅懸鏤鏤檻虹梁巨構風
牖承楣倒井蕪薜芳壇竹埽銀鋪月曉瑤簷霜開至
若神理全幽真容罕測夫其祕狀遠降使司蓋考三
仙之圖不於九牧之鼎激姿粉堊備質光妍忽想冥
標靈侔瑞表工徒罄想殊思感通齋室盟祠旣優如
在霓旌霞旆時颺羽儀列冠名山禮均行潦覃薰紫
極供養黃冠玉釜常煎金爐永爇牲牲拴革享鸞鳳于
飛露挹神翁星臨婺女清吹洞唱天渚匏瓜之津匹
水仙宮海曲蓬萊之島龍驤鶴翥飄颻淨戒之庭師

子辟邪趨躍精思之地球幡衛篋瓊蓋特輿法供天
厨六時朝念真經雲帙萬劫脩行弗翦茅茨明代久
彰於克儉經營梓匠神理邈尊於寵光聖渥堂闡靈
棲窰宅竭來禔福不亦宜乎冬十有二月司存式命
畢鉤繩也玄門道士章冲寂等挹教五千齊驩億兆
歷仙階而仰止攀睿筭以驅誠天使願奉於雕鏤心
存魏闕法衆希憑於琬琰道在吳岑春水桃花迷源
遂遠幽林杏塢勝地非遙伏賀天休敢述頌曰
道祕重冥神幽福庭三景運極五嶽棲靈其真有物
厥妙無形理則恍惚功惟泰寧於赫皇極照融亭造

睿握玄珠祥丕大寶蒼垠集既紫雲宗道至享百神
探因五老乃睠崇山嶽靈之秘三象浮精十華仙使
威瀋雲雨神存天地法象昭疑真圖炳粹幸明德之
嘉運降幽祠之寵章扈仙儀兮肅肅曄瑞彩兮煌煌
爍琳宮之夕照拂琪木之神光雕輝兮翠輦玉金兮
調香擷五芝於秀嶠攀八桂於飛梁龍吟鳳舞天路
長青雲衣兮白霓裳節空歌於瑤磬臻羽旆於瓊漿
冥激兮福宇影眇兮神極牽匹水之布流睨煙爐之
綺色留鶴語於千載翥鸞裝兮一息絳河真母將易
逢碧海仙姑淼難測恭至道於三五奉休符兮萬億

紀真石於名山壯洪規於帝力唐開元二十年壬申

正月乙巳朔二十五日巳巳樹

跋唐九天使者廟碑

圓覆在上蒼蒼正色而一氣之翕闢萬有之生化
莫知其然而然孰主張是孰綱維是即獨者之說
形體謂之天主宰謂之帝析理精矣道家書為明
言所以為主宰者維皇上帝高居宸極統御三界
分職而理猶世之帝王內有宰輔百執事外有方
岳侯藩絲牽繩聯生殺賞罰各率其屬以為民極
者幽顯一道斯固可以類推而儒者不欲言之難

乎爲言也青城潛廬三山真君降靈顯化昉有唐
之開元而推原本始蓋與無極道祖同胚暉於太
元司生化於品彙應運御世保國衛民可以世數
之久近後先之彰晦而臆度哉紹興間九江通守
葉義問纂感應記中有唐李玘廟碑近歲道流蒐
補故失首載臨川故守王阮錄寄事實一紙謂開
元廟成詔刺史獨孤正訪諸工文辭者製碑以進
凡六百八十一士謂李玘文稱旨命召固辭阮說
必有據泚玘字異豈舊記誤耶頌文葩藻可觀是
必棲道不仕嘗究心于真詮者我國家肇開景運

躋世隆平易廟扁爲觀爲宮若節春秋有嚴典祀
逮中興南渡真君之助順福善靈響交著上御極
文明稽古躬寶慈儉屬運度參會邊塵繹騷用震
于淵衷爲生靈請命秘祝書名惟謹是至前管轄
上清法師熊守中旣承詔祇厥事乃簪笏伏闕下
匄爲真君加徽號上乃親書三清閣三大字以賜
有旨即九天採訪應元保運之下加二字曰妙化
臣公許秉筆直西省演綸非材懼無以發揚聖意
守中屬書李泚之文并識本末庸侈上賜狄難孔
艱岷潛二福地氛祲慘結獨康廬穹爽屹峙此固

聖上所以懇懇乎欽崇之典，繪禳之供，于以寧國步，拯民瘼，與夫棲居甲帳之，竚瞻露臺仙掌之崇，侈窮人欲而妄希仙事者，可同口語哉。嗚呼！陽九百六運度有常，雖帝王盛時所不能免。然天道好生，豈忍其赤子之劉於鋒鏑，而人君者代天以予萬姓體天之生育，長養爲心，則兵禍可得而戢，和氣可得而致也。不然，保制劫運，開度羣品，何以見于龍漢赤明之寶篆玉章，而迺續乃命于天，用祈天永命，聖經垂訓，何乃冥契若此乎！今聖上憂勤思治，心與天通，否傾必亨，眷顧有屬，豈惟丹梯天柱，盡掃退於攬槍五老，崇山長屏蔽於江沔，將際天所覆，悉主悉臣，環兵鎮於四維，中央真神鼎於滎河，溫洛車書萬里，冠帶百蠻，祀宋配天，綿載千億，小臣庸鄙，職在詞翰，賡車文，茲高之雅，勒元和，平淮之碑，揆才非宜，尚能泚筆，以俟。淳祐元年歲在辛丑，重陽節，朝奉大夫守太常少卿兼直學士院臣程公許拜手謹跋。

皇朝景德二年重修本觀碑銘周起撰

臣聞兩儀既分，三才定位，高明廣運，象緯列於次，壘博厚無疆，嶽瀆限於方域，寒暑錯綜，而歲功序，陰陽

埏埴而神明生式是化權必有司牧所以協宣上帝
垂祐下民粵若聖人乃建皇極於是陳祀典考靈文
禳禳科教以致其誠車服采章以辯其數復無方而
設教迪妙用以爲宗崇德報功其來尚矣廬山太平
興國觀者即九天使者之廟焉昔在有唐開元御曆
肇肸蠁於冥感荷昭錫於至真將叩寂於清都乃旁
詢於方士憑慈靈嶽始建仙居泊上運載移四方雲
擾信靈心之有待協冥數於昌朝我太祖皇帝乘五
運以天飛撫萬邦而御極聲教覃於無外臨照被於
有截矧茲靈壤實惟奧區當九服之會同眷百神而

受職我太宗皇帝握乾符登大寶丕變風俗惠被黎
元墜典必興無文咸秩總帝王之能事推覆育之深
仁乃眷集靈之宮洪惟祈福之地特頒紫詔爰授正
名由嚴如在之儀乃錫紀年之號今上皇帝誕膺真
籙撫育蒼黔奉列聖之洪猷啓無疆之寶祚若乃自
家刑國敦厚於素風一日萬機憂勤於庶政况乎日
新聖德天縱多能宸章煥爛於昭回睿畧懷來於寓
縣旰食每虛於聽納烝嘗肅奉於孝思至於靈瑞紛
紛鴻禧累洽考前編而莫紀訪博識以未聞斯皆掩
在民謠稔熟與聽鑿井耕田者焉知帝力瞻雲望闕

者史不絕書是以中外雲趨華夷縻至率詣天闕疊
獻方聞以爲奉元符荅靈命允茲大典天既難籍雖
本錫於帝俞終俯從於民欲於是陳法從儼文衛封
巒肆覲方展於鴻儀瘞玉潢汾載陳於大報耀祖宗
之丕烈薦天地以至誠掩歷代之宏綱昭勒成之盛
禮豈直竹宮望拜方集於榮光祠嶺順風始挹其顛
素而已乎天慶旣已成矣洪恩旣已洽矣至於巖壑
叢祠史傳遺烈猶乃徧申祀享特築樵蘇况上帝之
元肱會列真之別館揆日非謀於改築庀徒不易於
前修爰詔侍臣精求匠石費從官給事以樂成軒楹
特啓於宏規藻繪重新於壯觀蜺旌寶座照耀於中
圍霞帔星冠周旋於列侍若乃飈輪戾止羽客朝修
星壇夜燭於絳光雲馭遙聞於衆聖當三元之令序
間六氣以雍和莫不寅奉科儀肅陳醮席祝皇圖之
睿筭祈民福於嘉生允集祺祥咸躋富壽宜茲華宇
申啓靈場江山回抱於四封襟帶交衝於八達信乎
神仙之窟宅乾坤之戶牖者也若然則紀靈蹟刻貞
珉昭示信書抑惟舊式臣濫塵近列莫有寸長幸奉
明恩謹爲銘曰

元后膺圖受天明命統御八紘裁成庶政澤浸含靈

風行號令奉若天道惠茲萬姓乃見庶官乃立民極
脩崇明祀光昭令德爲民祈福俾民不忒官既居方
神亦受職矧茲靈嶽巉巉太虛上真所相仙館攸居
江山迴抱水木扶疎紕正陰慝此焉慘舒道有汙隆
運逢開泰慶浹寰中教尊方外棲羽客兮精脩奉真
文兮禳禱雖冥數之有斯示神人之交會占使星兮
南馳爰厄徒兮江湄藻繪增嚴兮像設彤鏤焜煌兮
層墀瞰飛甍兮臨大道揭疊巘兮蔭華穰旣成之兮
不日顧民力兮何知肅肅兮上真眇玉宇兮重新彤
霞兮轉旆皓月兮停輪宅靈心兮昭格阜風俗兮和

淳祝皇圖兮萬祀熙品物兮常春

採訪殿記

朝散郎提舉太平興國觀輕車都尉賜紫金魚袋臣熊本撰之

朝請郎充龍圖閣待制知洪州充江西鈐轄南陽縣開國伯臣蔡延慶奉頌

元豐四年正月乙卯制詔中書門下江州廬山太平
興國觀九天採訪使者可進號九天採訪應元保運
真君即日中書班命于有司粵三日己亥權發遣江
南東路轉運判官臣邾亶奉御香祝辭來告四月戊
辰入內內侍省東頭供奉官臣廖維護勅書殿榜仙
衣幢節即其祠奉安又降綠章黃素醮於壇殿凡三

畫夜勅書仙衣皆藏以寶匣藉以文綉絳袍帟帔以
泥金雲鶴爲章榜字用金旁有龍鸞葩花飛動之象
綵幢瑞節致飾蕃麗皆出於中禁而世所未嘗見也
於是太平冠褐之衆與夫九江內外小天官吏緇黃
稚童莫不踴躍奔走動色相賀迺相與洎繁致慶成
之醮于祠下又八晝夜而相與言曰茲山自唐開元
辛未肇建廟宇距今三百五十有一年矣儲休錫羨
應驗昭晰國朝著令春秋長吏侍祠三歲郊禮亦遣
使告饗間嘗有寶冠霞衣命主履襪之賜所以荅賽
神貺恩亦厚矣今也天啓嘉會幽贊聖意講闕典加

隆禮盛文緝蓋歷世所未遑者僉來之首目具載
於詔書至於錫予之名數告享之秩序非刻之金石
懼無以耀四海之觀而永萬世之傳謂臣等備詞掖
適蒞真館宜有以紀一時之盛者竊惟聖上以鴻烈
光祖宗以達孝通神明夤畏夤思所以對三靈之
休故考禮文正祀典總公卿博士之議而制旨臨决
焉至於山川神祇降依茲人者無昔今遐邇罔不登
秩壇場珪幣固不貲飾况夫詠真之都釐福之庭正
名於軒后受職於太上懿鑠徽稱久鬱而未章宜乎
上心霽然發德音下明詔而旌顯之異也故精誠所

鄉符應既至使節南指則靈光屬霄仙殿夜闕而神
樂駭聽諸福之物可致之祥當自此而殫見矣方將
封泰山勒中嶽詩大澤之廣博燁閔休於無前臣雖
遠跡于外猶能追擊壤之民歌盛德之美矧今獲奉
熙事而文字頌述固其職也臣其敢辭謹拜手稽首
而獻詩曰

於昭顯穹睠中國兮維宋世世迪明德兮丕鑠睿聖
紹尊極兮文武勇智實天錫兮從容法宮考圖籍兮
振飭萬事揚幽測兮風行雷動醜惠澤兮焱飛景附
走夷貊兮氣調時豫民滋殖兮神騰鬼魅皆受職兮
巖巖高山敞仙宅兮總統靈官凡五百兮遊衍陟降
窮杳默兮福善禍淫淵莫測兮煌煌玉書發奎畫兮
進以顯號冠今昔兮椒漿桂酒列瑤席兮雲車風馬
來絡繹兮上真嘉娛百神懌兮瑞福穰穰與山積兮
入子萬年慶平格兮登封勒成耀金石兮子孫繩繩
保千億兮元元何知安壽域兮

奉安玉冊記

元豐四年神宗皇帝若曰惟江州廬山太平興國宮
九天採訪使者蓋天之貴神與世爲福而隆名微稱
歷代置而不講甚非所以答賽神明之意其進號應

元保運真君遣入內侍省東頭供奉官廖維護送
金書殿榜并勅文即賜焉先是本觀道士陶智仙誅
茅剝宇發地得殖瓊一破之以土實厥土五色獲銅
泉一其文曰應元保運初不知其何祥也後二年而
明詔寵加與泉文符廖維即取其泉以獻恭惟皇上
南面百神受職天啓其衷幽冥同符不其偉歟粵政
和五年今上皇帝臨蒞天下之十六載以意承考以
道交神而神祇祖考安樂之式瞻四方靡神不宗乃
眷南顧惟應元保運真君陟降庭止在帝左右惟我
神考肇建鴻號而典冊未備適追繼承其在我後之

人乃命有司備禮冊命焉遣入內侍省敦武郎黃
京奉上册以至冊文有曰皇帝名且曰謹再拜言其
其恭如是守土之臣與令祠官跪起薦進惟謹厥冊
刻以嘉玉貫以金滕藉以文錦外匣下牀彤髹鉅飾
光彩焜耀窮工極麗不可名字冠褐之徒裁目榮觀
歡呼鼓舞舞動色相趨既而奉安於別殿之後一年而
祠吏臣芻實來奉香火黃冠羽衣無慮二百輩鴈行
而進曰主上原道德之意崇黃老之學寅奉明神幸
脩闕典禮重文蔚繼後光前而金石之刻不刊無以
鋪張玉靈昭示來世非老於文學者其誰宜爲臣芻

曰道士言是謹按錄異記唐開元十九年明皇帝夢
神人朱衣金冠乘車而下曰我九天採訪使者當館
我於廬山西北隅明日又降於庭命吳道子寫之遣
內供奉持使者真圖建立祠廟於山之陰明皇帝親
書繆篆殿額以賜之其文曰九天使者之殿而無採
訪之稱其榜固在也建廟之初祥異甚夥事見李泚
朝碑潘觀祥驗記張景述續潯陽記陳舜俞廬山記
故世謂使者之號廬山之祠皆權輿於有唐發祥於
明帝也臣芻豢之不然按五嶽真形圖其說曰五嶽
皆有佐命之山崧岱華恒以少室武當羅浮托蒼地
肺女几河逢抱犢爲佐命分治四嶽惟衡嶽孤峙而
無輔故黃帝省方南至于江請命上帝迺建潛霍二
山爲南嶽儲君又拜青城山爲丈人廬山爲使者則
使者之名尚矣真形圖雖興於中古然歷世方士祖
襲授受東晉之世輯而成書不可誣也開元中天台
司馬子微謂五嶽皆有上清真人降任其職因勅五
嶽各立真君祠其說蓋出於真形圖而開元詔書青
城丈人廟廬山使者廟選道士奉香火視五嶽真君
祠則廬山房祀意自司馬子微發之其盱眙昭晰見
於夢寐不可知也詳攷傳記使者之神蓋德鎮之高

真祝融之夾輔云其說見於東晉之前而九天採訪之名蓋後世所加其廟於廬山之北則自唐明皇帝始至南唐改號通元府本朝太平興國二年始以紀元賜今名世惑於俚俗膚淺之碑齊諸志怪之說弗加深考以失事實故併論其本末以祛來者之惑焉重和元年十一月十日建朝散郎提點太平興國宮賜緋魚袋臣洪芻撰草莽臣待其俸篆額重和元年十一月十日道士臣陳思恭臣陶知常臣章安正臣沈繼彬臣李仲恭臣蕭敏脩臣高至道建

三清閣記

太中大夫守尚書兵部侍郎兼直學士院德安郡開國伯食邑九百戶臣吳愈撰
皇姪慶遠軍承宣使天水郡開國公食邑二千戶實封二百戶臣乃裕書

惟皇上帝弼我宋丕基聖天子嗣大歷服寅畏天命宮築敬天之臺坐列欽天之圖陟降左右無適非天而揭虔寓敬之地凡可以爲民祈天者亦罔不留聖心明德恤祀百神受職先是江州太平興國宮九天採訪使者靈應彰灼列聖褒嘉冊號應元保運真君至是有詔增以二字曰妙化且親灑二大字曰三清閣以賜之龍文麗空鳳詔炳世瞻仰傳誦震于四海於戲茂哉夫天得一以清無聲無臭至矣道家者流

上宮玉清中宮上清下宮太清意者道本一元氣分
三境恍惚之中有是象耶凡天下道宇莫不崇三清
而事之宮在廬山之陰舊爲採訪使者廟由唐開元
迄于我宋自廟而觀自觀而宮琳館瓊房霞祭星列
微稱美號先甲後庚卓爲天下偉觀獨三清未有殿
管轄宮事臣熊守中謂非報本返始之義也乃即真
君殿之前建巨閣以奉焉蓋經葺八年而始成閔麗
穹峻稱其教法前帝後臣神位嚴位禮備而道順矣
真君之靈聞天下我國家自六飛南渡視廬山同五
嶽凡疆場之事禱焉歲之水旱禱焉盜賊災異之變

咸禱焉齋香命官其禮逾重無謂不獲其受命如響
蓋嘗思之惟天聰明臨下有赫福善禍淫虧盈益謙
要必有代天之耳目者其殆採訪之職歟上帝命之
以稽察四方亦猶人主命臣以諏訪天下四時行而
萬物成凡皆以佑我民耳惟天佑民罔極惟后爲民
祈天亦無所不用其極此三大字之所以賜也閣之
成以紹定壬辰夏六月甲子上賜之以嘉熙庚子冬
閏十二月甲子凡州之民莫不蹈舞願刻金石丕聞
上帝之命對揚天子之休永詔萬世臣家世于廬山
下今幸待罪禁林執筆歌頌職也謹拜手稽首叙其

而獻詩曰

廬山之勝秀出斗旁參于衡嶽鎮東南方民人所瞻
神天攸宅賚夢之祥迺興自昔惟天聰明矜此下民
監求其莫恐有不聞惟神司之雲輶風馬迺諏迺訪
周遊天下不疾而速不察而明天何言哉民無頓呻
是爲福庭列聖祇敬錫羨墮祉有感斯應明明我聖
惟一乃心不顯亦臨敢有弗欽寶畫金扁徽稱明詔
日月之揭山川有耀邃殿在後新閣在前如君當御
而臣仰焉時節冠珮會朝帝所達民之情佑我聖主
民戴我聖與天無極天佑我宋子孫千億民拜稽首

願垂表經從臣刻辭永賜休聲

宮記

咸在嘉定戊寅清明福州靈霍童景洞天羽人白玉
蟾袂香趨敬九天御史臺下頌馬宮牧陳至和飲以
醴逮予之玉華也醉屢飄忽弗違而邁承遣道士陳
守默陳如一約爲文以記其宮豈容遜也其文曰九
江故郡千古廬山乃仙靈詠真之洞天實紫元景曜
之神府琅庭琛館隱於丹崖翠壁之間羽衣霓裳混
於青牛白鹿之際猿啼玉澗鶴唳芝田地接炎衡雲
連潛皖金童戴月傳麻姑閤皂之書寶仗凭風赴委

羽括蒼之宴琪花開盡朱鳳飛來五老峯玉井寒深
白龍湧出三峽水松蒼石栴襟九曲而帶羅浮竹老
草靈輻三茅而轂大滌北頭紫極西睇青城城會楚
吳星分軫角神剋鬼劃諸峯三百六十巖山瘦溪寒
一夜八萬四千偈周時康子孝佩雷壘於林間晉代
許旌陽飛鐵舟於木杪劉越掩赤城於石裏雙戶疑
紫金董奉種紅杏於溪東千朝騰碧落蔡李舉玉棺
而冲去鍾呂啓金匱以相傳馬瀑濺濕劉混成之衣
虎溪淘碎陸簡寂之句靖節酒醒佛社親植西天蓮
義之書忙穀雨惜羹白露筍陟崇岡之勝槩採先哲

之遺蹤剔蝸銀朱網之幽攷草碣苔碑之舊欲揮椽
筆以紀琳宮明皇開元十九年仲秋二旬有一日特
遣殷勤之使俾新採訪之祠爰究其原實基所始昭
陽寶禁金鈴驚醒夢初回神霄天君王騎迎歸天欲
曉靈符宮裏早朝憑几諭羣臣含元殿前雲鶴盤空
輝八極千幢萬燾霓旌鳳蓋颺晴霞三冕九旒風馬
雲車散花雨上清五百珠吏握蒼龍監兵之符太微
四六瑤仙掌金虎飛雲之印十二溪女騎玉鼈而跨
金鯨一九江神御錦蛟而坐翠蜃三官執籍校天地
山海之圖六丁操戈守日月星辰之錄左防觀而右

護法金鉞橫霜前飛遼而後延精錦牙耀日四帥麾
節驅雷公電母之羣五嶽旌旗奮風伯雨師之陣九
州社令祀社稷城隍之書八海龍君捧龍蛇魚鼈之
典司命翼駕典禁侍軒蕭鼓鳴空髣髴鈞天之九奏
笙竽響翠陰沈禁漏之三更風迤琵琶宮女倚芙蓉
而側耳露淒感粟仙嬪舞芍藥以薦觴漂渺煙霞語
出青冥之上依稀綸綍聲傳翠葆之前比登太清混
元之天親稟五靈皇帝之勅丈人鎮蜀玄命治舒吾
於康廬西北之隅蓋建九天廉訪之治十七世之後
覃戩穀於生靈一二日之間運揆楠於基址但須斤

斧庸治宮墻糾察萬靈簽書四府應陰六元一之運
司陽九百六之經言將訖而吳善善丹青事尚新而
李泚入竹帛麟輿倏已去馳馭不可追一念感通于
官瞻禮令潯陽刺史獨孤正率羣僚而營創祠壇遣
神都道士孟仙真凡五人而焚修香火不雨而暴漲
暉水神作殿之材正晝而反風移地主所居之屋粉
堊丹綠掘地而尋甄瓦石泥非人而至仙燈夜現泉
真隱約於陰霾楮鏹曉飛萬鬼往來於野渡木像入
廟而流汗粉楹臥地以發光龍跳朱樓樓影高浮雲
影亂鴛鋪翠瓦瓦痕冷織月痕花暮歲工夫梧葉秋

萬邦香火蓮花會梯山航海無遠不來星燭雲壇迄
今尤盛江淮貢金貝人如蟻而日如梭閩浙走香花
袂成帷而汗成雨再瞻仙躅適當聖治之峯前爰相
案山遠及靳黃之界外負仙鶴冲天之勢對遊魚上
水之形自良臨震屬貪狼正天醫玉兔之位折巽歸
乾入姑洗乃鶉首金龍之鄉霜劍鐵獅更蜿蜒於西
巘香爐石鼎並盤礴於東峯控御兩三州環望數百
里天寶爲廟而昇元爲府太平改觀而宣和改宮雖
亘古以昭靈亦歷代而沿革太宗登大寶新翠輦至
釜之榮真廟搃元圖特紫札金牌之賜粵從興國春

秋責兩醮於守臣逮至政和位號已三登於玉冊祥
符降蠲稅之令天禧賜度牒之恩月破御香三百斤
歲設國醮五六會金虬玉牒荐有寵光鳳畫奎文益
增鏤誌銘昌鼎筭騰景瑤京星使護船玉鬣盤花枝
而現瑞皇華投幣綵雲帶華蓋以鳴鞭元豐鍊師獲
銅錢於土缶神宗明詔上寶號於金庭四字相符一
時咸異建炎戮張遇顯龍馬於碧空開禧馘吳曦奏
犬羊於紫闕炳靈愈煥降社彌繁蓋玉虛朱帝之尊
亦金闕赤皇之化靈姿妙粹秉太元碧琳之圭瑞相
端妍衣九光紅霄之帔丹盈羽襜瓊華碧簪冠偃月

金晨之冠履天風朱光之履曳玉銖之袂服海嶽之
蒙五印凝丹一劍橫素分景作玉鍊火帝化形爲南
上真君其爲炎極之皇或亶太陽之政巡遊三界監
御萬真初皇之九龍中皇之九都下皇之元都化爲
使者黃帝之真元堯帝之元一舜帝之太一皆乃真
形夏禹朝謂蒼水之神周穆世曰天靈之使唐朝肇
跡宋代隆禧琪木晨光擷五枝於秀嶼珠宮文照蹇
八挂於飛梁高雲舉讀洞經於錢塘親承降顧龔慶
長閱名籍於向氏備諭威靈吳大和而增丹牘之光
唐保大而葺黝赤之弊中厄兵焰半爲草墟運星鉅

月斧之勞復煙摘霞薨之勝內而方丈外以三門輪
奐崢嶸金碧絢爛三官殿四聖殿輔弼正官道紀堂
抱一堂掩映虛室山光軒與擢秀軒而爭爽朱凌閣
共景陽閣以相高寶藏諸經開天上圖書之府華庭
申福燦人間箕翼之躔榜扁雲無心泉鳴人聽雨兩
廊綵壁繪絳衣碧弁之靈四面粉墻閉紫木黃芝之
茂倉院粟紅而貫朽庫堂茶綠而水香崇廩齋山河
伯轉輪而舂穀香厨蒸霧原夫餽飯以擔薪霞帔星
冠萬指之張頤待哺月壇風峙幾代之棲山宅靈面
乎覆船山背彼飛雲洞門外古石樹爲劉仙之亭宮

後我暈聿建靈澤之廟道院十九所居鳴琴嘯劍之
流官廨三五間延秣馬脂車之客碧流遶舍綠蘚封
堦天籟一鳴山鳴谷應風箏纒動水動煙寒萬枝紅
女媚芳塘千丈蒼官迎古路真神仙之窟宅况泉石
之膏肓素瀑紫巖側援星江之地白蘋紅蓼每遊滄
浦之時朝家太平興國之官爲侍從奉祠之所真君
應元保運之號迺聖明縟典之封古今幾何年曾未
鑄翠珉之字髻乳一小子詎可賦白雲之篇有命奚
辭聊詩以記

九嶷真人元夷君笑騎玉龍飛紫雲手持五帝伏魔
印霓旌羽仗朝太清親受混元皇帝勅浮駕萬鶴下
紅塵芝輶一憇仙韶響千騎屯空驅火鈴昭陽宮中
夜月麗樓殿簾幕風泠泠明皇夢裏與神遇乃知九
天使者名凌晨輦出明光殿宣諭百辟聞且驚玉殿
再設香花席羽蓋瓊輪泛杳冥忽聆青鳥鳴一聲舉
首天際瞻羣真風雷震吼雲氣騰麟車鳳駕森不鳴
三十六官散天花千官羅拜如雲崩開元天子一稽
首翠葆深中語如綸傳言太上愛黎庶遣使廉訪遊
八絃九天九地萬品彙盡我掌握今枯榮廬山西北
地可廟千歲之下崇香燈言終奄忽入空碧詔遣獨

孤老守臣殷勤天使捧金幣營建官廟福生靈一夜
無風水自溢千章杞梓飄山根市妖運芥山靈奔明
年秋風吹落成萬家共結蓮花會龍樓鳳閣挿天星
寥寥五百春挑花落花流水洞天春我來炷香九頓
首神霄故吏問山人爲言聖宋啓仙祚五朝明主增
寵榮歷年春秋國一黜宸晝光燦龍鳳形頃年逆寇
忘國恩仙飈親控蒼龍兵神通變化不可測萬民陰
受雨露均金鏤賜牌銘景旣實及朝疑瑞雪馨彤霞
肅駕騎北斗飄忽虛極嬉蓬瀛白鶴青鸞香不歸博
山香穗一縷青青都絳闕渺無際醉拍上欄呼雷霆
九霄真皇分萬化景飛飈舉夜吹笙聖主煥文耀層
漢鏤玉填金藏翠京國朝鴻烈等天地充塞天地函
魚鳶小詩何足紀盛事聊歌丕德光林泉持螯酌水
歸去來一枕清風千萬年

授墨堂記

潯陽乃天下江山眉目之地廬山蓋仙靈詠真洞天
虎溪福地也嘗聞之晉鍾離權棲隱於山中歟唐呂
洞賓過山中遇鍾離獲刀圭之傳後與之俱仙矣紹
聖間輪囷子杜曠著冲真先生胡公遇仙傳胡公則
太平興國宮道士也宮則九天採訪之司也居廬山

之陰凡聖同居隱顯莫測胡公諱用琮昔爲山中道
正時有道人姓回冠華陽青綃之中衣開元崇玄之
服垂飛雲玄縑之紳躡寒雪素絲之履美鬚眉豐臉
腴綠鬢而隆準碧眼而方頤氣宇昂昂風神燁燁過
宮中莫有延之者獨胡公款以杯茗旣而語笑自若
乃拍壺而點胷索酒以待酌一壺不竭百杯有餘由
昕而夕飲不知醉復欲邀胡公飲于邸籌新糟膾小
鮮胡公辭以日暮而回道人乃掀髯長笑去矣宮之
距城有一舍之遙翌日胡公謁郡侯款城關尚未啓
鑰道人又自城而出笑與胡相顧而去閩吏云子夜

回道人已此候門久之胡公心亦異其人矣後數年
敝衫破帽革帶麻鞵自稱大宋客扣胡公之幽院自
肩二酒壘示胡皆黃白之物取碎銀以鬻酒繪飲至
日昃以鐵刀剔土瀝殘酒漱津和土成墨擲之几上
錚然有聲胡公醉臥胡牀而客拂袖不知所之滿室
異香彌日馥郁其刀皆金色人爭市之乃以墨研酒
而餌其半宿疾頓甦胡公年及七旬顏貌如處子酒
量不減八仙誠異遇矣若夫大宋二字切音乃洞字
也二壘者呂字也所稱客者賓也則呂洞賓之相遇
明矣胡公由是漸厭人間一旦留詩蛻形而去向之

醞墨之地忽湧泉五支左丞王公案過之爲名墨仙
泉侍郎宋公伯友與左丞皆有墨仙酬唱之什有綠
膏換得朱顏迴白髮不用黃精拂之句太尉譙國曹
公勛清虛真人皇甫坦采其事實以聞于德壽殿高
宗甚嗟異之胡公之居先日遇仙堂改爲授墨重樓
複屋瑞氣蔥蔥古井寒泉四時瑩碧奇哉廬山異事
也故爲之書將以補仙史之遺云

地主祠堂記

陳氏原乎高辛其派如流泉漢曲逆侯佐沛公王關
中卒成相業自茲世代煌煌子孫燁燁陽而侯封陰

而廟食者代有人焉昔由潁陽徙居閩粵者甚族者
古無諸郡梅川侯姓陳晉代人也廟于南山李花林
嘗遜地以爲仙源洞宮古武榮郡莆田侯姓陳亦晉
代人也廟于壺山風亭驛亦遜地以爲清源洞宮有
如富沙之蓋竹侯臨漳之靈著侯皆陳族也名山大
川陳氏血食者莫知其幾唐廟隱君陳其姓莫知其
名或曰諱伯宣者晦迹康山注史記以行天下詔徵
不起就拜著作佐郎家儒世仕旣居聖治峯之前開
元間明皇夜宿昭陽曉御靈光凡兩覩九天採訪使
者之相面承聖訓使就廬山西北之隅委江州守臣

獨孤正樹廟勅差孟仙真等五人奉香火先是勅黃
未下際無人知一旦有峨眉星曳霞者詣陳門曰混元
皇帝遣元夷蒼水使者持九麾五靈之節廉訪九天
九地生死枯榮之籍今天子親詣使者欲於廬山建
九天御史之臺五百年後福被黎庶吾以爾所居瑤
壑葬月玉淵影天真勝處也宜搢厥地而基其廟歟
爾他日換世當爲臺屬使爾司是山而廟食矣陳旣
諾道士出門恍失所在後忽迅雷烈風移所居于宮
左即其址以爲祠焉祠旣落成陳亦羽解遂得世爲
此方地主矣厥後移居德安縣之常樂里久而又分

派于丁山之別業兩被國朝義門旌表之命遂以宮
左故廬爲地主香火之地國朝改祠爲宮而陳氏亦
跨龍者登瀛者握蘭者入翰苑者坐釣臺者弦誦琅
琅簪珮鏘鏘闕闕堂堂旌旆皇皇盛哉盛哉其耳孫
陳琢控青鳧策黃鵠委宮門直歲道士向德新市榷
楠價陶埏撤而鼎之塑神像十尊締神宇六間兩重
門兩過道翠楠凝煙朱廊浸月簷鐸風而迓響燈龕
晝而長焰花磚織地璵楚生苔寶帳垂軒玉爐裊屋
金碧爛目朱紫驚人氣焰威靈儼若解語聰明正直
自古而今此蓋前監官事東溪杜道樞有以啓陳琢

也昔逍遙山金公避地以遜許旌陽桐栢山孫公避地以遜葛太極與夫閩中二陳之所以遜地爲洞宮者其與康山陳隱君一也隱君雖亡如存萬古一靈其必能鍊九乾六坤之鉛採三震四兌之汞脩成飛化之道不爲青靈之魂則其去仙不遠尚何神哉夫神者易曰大而不可測之謂神陰符經曰不神而神所以神化書又曰萬神一神也隱君苟能神其神則可以躡元夷之域登元始之鄉而與採訪真君同一喘息共一室廬豈區區廟食而可以滯吾隱君也哉隱君神人也其敢以告

重建地主祠記

真君奉使採訪即廬山而駐節記之者昭昭矣若夫地主陳公舍宅以爲官本末允神夷考舊聞自皇靈晝見於開元天子擇所妥靈事嚴未有以稱旨聖治之麓隱君子陳公家焉佳山水也一日方士欵門以遷巢爲公諷公欣然顧不難於遷而揆力未逮迺風霆夜駭屋廬無撓詰旦盡室已南徙矣於是神職效珍子來畢瘁因溪阜爲墉洳架雲霓於棟宇由廟而府府而觀觀而宮真館日增異境亦曰廣有非人謀所及原夫宏規偉制雖云地闢天開要皆公曾中之

丘壑也人之情私戶牖者不知有藩牆之外不忍其
身之不宴則皇恤乎異代之戚休今公捐世守之業
以爲生靈請命割吾廬之愛以開後五百年黎庶之
福高識邁往誼槩薄雲使爭席野老見之能無媿汗
是足主茲山與宮之香火相爲久長矣歲在旃蒙大
淵獻道院以兵燬殃及于主祠事定載葺其明年落
成管轄宮事周得一副知宮事周承源請記其廢興
余聞之公自徙家系傳而世次莫考好事者徃徃以
譜疆附于公獨古碑有知宮事呂至信刻初降像而
以事繫之曰今乾步是也世以爲余族焉兵火屢更

家無完牒不敢效宗翰祖汾陽以爲公羞雖然公之
賢雖微吾祖猶應記之况呂碑之傳如許哉於是乎
言太歲丁丑至元十四年上元日山之民石礪陳有
宗記山泉居士吳蒙題蓋

重建地主祠祝版

至元十三年歲次丙子二月丙寅朔初三日戊辰住
持宮事兼領管轄周得一副知宮事周承源監臨同
主管宮事伍永懷與宮門知事道衆等敢昭告于恩
府地主陳公感應大王惟神夙有仙苗毓靈聖世採
訪分司廬山開治玉趾親臨曰捨此地當獲靈佑言

畢隱去雷電宵馳不驚春寐神運厥居山之南際廟
食一方遐邇福被自唐而宋越五百禩建炎寇江陽
九厄至宮庭灰燼草萊填翳隨即中興扶顛起廢畚
築撤新香火如故南渡于今幾更祠宇朝謁軒繁縈
神之助豈謂乙亥祠又延燬大數將期非神不祐地
覆天翻其毒太苦倉庫蕩然束手無措粒食不繼命
懸一縷百孔千創非昔年比舊逋未償新債又舉朝
夕靡遑妥靈無所輒不自揣奮空撐拄幸藉擅那慨
然樂施經營新廟還復舊址將次落成悉資神護消
日惟良適逢脩禊軟牲醜酒敬酌元誓少長咸集慶

安神位幸攝化於十方俾庫帑之豐裕簪褐聚居而
叶和主佃相依而安堵茂衍香花敢忘神賜尚饗維
至元十六年太歲己卯七月丙午朔初六日辛亥通
妙冲真大師江州路道教都提點管轄諸宮觀太平
興國宮都監住持官事周得一明素凝和大師江州
路道錄提舉諸宮觀知太平興國宮事周承源崇道
大師江州路道判太平興國宮副知官事劉宗傳興
宮門知事道衆等敢昭告于恩府地主陳公感應大
王惟神秉靈此山垂佑宮庭遠來近悅福被民生聖
元革命祠宇變更度材改築五載落成美哉輪奐炳

然丹青殿陸整肅門徑闢平規模宏遠莫之與京悉
自神化於人豈能日吉時良揭虔妥靈薌茗牲醴于
豆于登洋乎如在昭鑒微誠真靈香火協贊中興簪
褐聚居各保安寧疢癘聿消倉庫充盈歲時祀事敢
忘報稱尚饗

九天採訪真君行宮記

善言天道者至自然而止然其監曰天監眷曰天眷
視聽秩討惟天之歸是無爲而無不爲無言而無不
言其自然者固體用兼該不過行其所無事耳古人
知其然故奉若其道克享其心參贊其化育迭續其

休命若諉曰天道遠不可致詰付之悠遊以爲自然
焉惡可黃帝堯舜垂衣裳而天下治與天爲一矣至
其下民必清問岳牧必徧咨明目而達聰黜幽而陟
明何嘗一日而忘天下迨德下衰猶有人主耳目之
官懼其不廣且於內外增廉察之員而後遐方絕域
莫逃於萬里之明見此採訪之宮所以自天啓之而
行宮之設尤人事之不可忽也真君自開元瑞應干
聖治之薦得陳氏故居以宅厥靈於是潯陽郭有西
坡之解萬壽之觀真淺原之白勝崑崙懷溪之昇龍
紫陽皆祠之分建者珠庭珍館相望於江上矣非顧

為是多事也祠稱採訪是為上蒼監臨之司則幽遐
必徧燭淑慝必精別特使採訪之下任司特之寄者
無負於惠養承流宣化者無負於撫字為人臣子者
盡事君之忠事親之孝以無負於覆載庶可對越以
免於戾否則昭昭在上毫髮無爽休咎將於是乎分
其敢不敬世道所關非其他香火緣以矣眷維雙鍾
之邑距聖汜百里而遠獨分祠視他邑為陋翠麓周
氏為邑望族周君恕字公叔又族之望自羅兵火冢
靡孑遺旁求嗣續未有所遇乃念處人倫之常者猶
有子孫不皆賢之歎或不幸無後而擇所立亦必務

在得賢徃徃圖回於積年而未易定况吾值其變老
為窮民朝不謀夕矣乃將茫焉求一乳臭以托餘生
則身計以大謬而高曾以來銖積寸累者付之輕擲
於此心何以自慰吾當內審於心有可以建之天地
質之鬼神以上契吾祖禰之心則事適乎權何敢求
其盡合於世法今採訪行祠猶吾邑之闕典思欲恢
拓其規使吾之家祀得依神聖之香火相為無窮則
祖禰不為無托乃謀之廬山太平興國宮管轄官事
提點周得一知宮事道錄周承源願捨田若干頃莊
宇在焉地若干畝祖隴在焉為莊扁以翠麓創採訪

行殿一所旁建飛天法輪及諸聖像周氏祖禰祠堂就附東偏歲自宮庭分遺道侶之公清者以主之上可以效贖華祝爲作民父母之聖主祈天永命次可以希風魯頌爲輔世長民之賢臣集福延年聖號所謂應元保運神化昭順此其證也又次可以爲吾之高曾以下得聽法聞經超凡希聖之階又次可以爲吾邑井鄉黨得日脩勝事歲濟豐登之便聖識所謂五百年後福及生靈又此其旨也吾祖父如有知焉幽幽之中能不釋然以慰躍然以喜哉聞者莫不稱善乃白之郡邑給以書契蓋至元十三年六月日也

備是年之租入爲祠宇之創始未落成公叔以疾終得年七十有五先已自叙其顛末遺言求記之者有宗未熟公叔而稔其事乃爲志其大槩且諭于衆曰捨宅之源委旣如右矣觀其所自叙則於祀祖先資冥福護丘隴之事一編之中屢致意焉以繼志述事之難其入而托之方外之士則受其托者良亦不輕一言之發顯幽臨監大其生也旣以是屬之其人則其歿也將以是請之於神苟得請焉則非受公叔之托實膺上真之托矣重然諾者其良圖之圖之如何經紀必務於周密委任必擇於謹厚以任山甲乙之

規視周氏之宗紀使其香火相繼於無窮則公叔爲不死矣至元十七年清明日石礪居士陳有宗記并書少中大夫江州路總管兼府尹鴈門楊仁風題蓋

太平興國宮營造記

潯陽爲江南重鎮廬阜爲潯陽名山神禹之所嘗登而刻石者秦皇漢武亦皆紀功其上傳記所載班班可攷它山蓋不得擬也山中道釋之廬不可縷數而太平興國宮獨以九天採訪真君宅靈之地而加顯爲自唐開元帝感異夢一時脩奉備極旣命吳道子圖寫像貌復命獨孤正建立祠宇神運之木隨用隨

足談者以爲異由唐而來世代凡幾更革林谷凡幾變遷由府而觀由觀而宮雖或興或廢而真君之靈則猶一日上之尊崇愈至下之信向愈篤又豈他神可得而擬哉歲乙亥國家混一六合九江市不易肆各得全生而官去城差遠不無過卒之擾知官事周得一副官事周承源慨然有感於宮庭之毀剝田園之荒蕪欲圖繕葺而無其力左丞呂公時開大府亟以告焉隨助以廩粟貸以耕牛俾招集羽流經理舊業越三年租入漸復其故於是廢者興仆者植殿堂廊廡一時俱新湖邑有周公叔者悉以其家產爲香

火之奉宮前之田間有爲豪家所據者亦皆歸疆由是官始始裕道衆日增鐘磬日響九重遣使降香東西行者莫不舉手加額山靈改觀神人咸悅是固二周君辦一肯心之所致而非呂公惻然于始則二君何從致其力哉在昔建炎初宮嘗燬矣通元大師周孚先實埽地而更新之今二君皆其近族後嗣信於此山有緣如此余行四方每歎夫事之壞爛頽廢而不克振者何可勝算豈皆其勢之不可爲哉蓋上下悠悠而無惻怛之念爾乃若潛山青城盍與真君同時著靈而兵革之餘皆不復如舊又安得不有感於

斯余九年寄迹有禱未嘗不孚留滯未能即歸故隱歲率一至宮中辦香致敬二君俾記顛末用不敢辭姑爲記大畧俾來者考焉若夫土木凡用則不著至元十八年歲次辛巳八月甲子承直郎江南瀛溪書院提學牟鎔撰并書嘉議大夫常德路總管兼府尹李秉彝篆額

太平宮新莊記

真君殿碑蓋龍興據其所具而作及以疾歸留宮踰月與身見而言傳者或異遂更訂而丹書之旣入石矣猶有一遺其曰始田履畝財及三千今萬有奇若

合其舊爲一而言今則不然皆冲靖真常微妙法師
湯均提點知宮錄江州路道教之後之致者獨萬有
一千其道有三曰貨取曰施入曰力作余歎其用志
之確親勞之多無文以彰之世烏乎知爲目其諸莊
與地在所及其施入之主之名自多表之以及其寡
今最貨取三千六百五十惟石門千二百八十爲多
其不足是者啓石二百八十錦溪七百五十石塘九
百一十龍岡九百六十上龍溪千二百三十惟啓石
居興國大治餘皆江之德化最施入者五千三百五
十惟翠麓二千二百爲多高岸半之元山千二百萬

安千七百福興千七百四十趙陳二千一百帶高岸
居興國之永興元山居蘄之黃梅其故主則屬堅孫
項至大餘皆江之屬縣翠麓湖口萬安德安福興彭
澤趙陳瑞昌其主周恣胡榮呂師山則碑福州路同
知者興齊永年云力作者創四茗磴於德化縣曰義
興莊凡四十有二盤又墾田二千肇爲五庵宮之前
三曰東西太平興紫元宮之後二曰湧翠鼓峯其始
皆管茅撲檉衆所薪牧之園皆募人錢鑄銚斧而出
高時松杉栢茗皆摘實授子畦而苗之移置其地下
種薑芋藟茜與水可墜稻者皆令募人有之其利不

入公宮以勸夫未至者余聞之肩輿歷至其所而觀
焉經始久者方五年近者一歲而木之布列岡阜薪
者雖沒草間而生意茁然久者已離立如人將數萬
本其畦而未分猶盈畝焉篁篠斬稍而不傷其鞭畚
故土取諸他山爲箇不可計意者倍獲乎木筍已叢
出其下特未林耳君登高丘指宮林以相語曰聞之
故老之山始亦榛莽如是吾所材而用之皆基先民
今荒山可芟治者猶或數里天假吾年而爲之不置
或得盡闢百年木皆連抱可使後人資以治宮亦吾
於世生不虛也余曰嗚呼君之所言政古人所謂人

棄我取本富之要也迹是爲心何事不可爲何功不
可集宜人之動盪鼓舞割所愛惟懼施入之後不然
彼其家田民賴以食其力也將以尺帛斗米遺之
猶戀嫪移時响响然收恩而後以授况是連阡亘陌
之田直或千金無所望報棄之若鴻毛非有以服其
心者能然耶余惟久此又聞其將大衆之法道流非
有故不入田民家民之入錢取薪炭山者皆給之券
恒遣力人持挺行邏林間盜采者有罰錢穀入出井
井有稽舂磨之細不遺糠粃公宮大庖日炊米十斛
可食千人其徒皆就食宮堂來必道斃以示不曩職

宮事者各有子院有釜鬲不作飲食惟待茗茗頽水之須其僮奴之守舍與諸菴遠宮數里者爲飯皆日賦之子院不得設塑像旦夕惟即瞻禮於宮余問其然則曰子院強則公宮弱強日益富則公宮日益不足不足勢必下求子院一則應再而緩三則柔者德之以色剛者拒之以言上下之情寢以離矣不若同甘共苦以公宮所廩養之爲可恒也嗚呼他道流能遠計若是乎嘗與一二知已私竊評之白須蝟磔有熊豹之姿已見其力足任事加以沉深有謀寡言而信威而和誠如恪視數百人黃童白叟約束如一使不爲老子法用世而爲將帥可以進退三軍立功萬里今顧爲九江黃冠師枯槁山林已是也耶因叙田及此君名德閏字季玉號薌澗其左右君靡朝以夕盡其勞勩忠於其官同成功者中外四十九人紀諸殿碑可考而知嘗觀漢費鳳韓仁諸碑書多不滿石或三之一或半焉而空其後豈待天嗣有所書耶故今例之亦法古之一也

大德九年歲在乙巳日短至中奉大夫江西等處行中書省參知政事姚燧記并書及題額

廬山太平興國宮採訪真君事實卷之六



